



A produción teolóxico- espiritual e de tema relixioso en Galicia (1977- 2000)

Victorino Pérez Prieto

Sen dúbida ningunha, nos últimos vintecinco anos produciuse máis literatura teolóxica, espiritual e de carácter relixioso en Galicia que en tódolos anos e séculos anteriores. O inesquecible Nicanor Rielo Carballo deu conta case exhaustiva desta produción ata hai cinco anos (1996) no número 100 de *Encrucillada (Libros e publicacións relixiosas en galego)*. Decía ao comezo do seu traballo que nunha conferencia do ano 1963 en Lugo afirmárase que “o libro relixioso en galego non existía”. Alí fixo una exposición cronolóxica de libros e demais publicacións ano tras ano. Non puido anotar alí o primeiro tratado teolóxico en galego: Celestino García Romero, *Inferno e gloria*, pois foi publicado posteriormente (Vigo 2000).

Tentarase agora facer unha exposición breve desta boa colleita en cantidade e calidade, organizada por temas e autores. Completáranse algúns baleiros do traballo de Nicanor (algúns libros en galego e en castelán, pero de autores galegos) e engadírase a produción dos últimos cinco anos. Déixanse fora os libros litúrxicos; para coñecer as primeiras tentativas litúrxicas galegas pode verse o artigo citado, pero compre engadir que nos últimos anos viron a luz a meirande parte dos *Leccionarios* (6 volumes magnificamente editados e encadernados entre 1990 e 2001) e outros libros litúrxicos: *Misal Romano* (1987 e 1993), *A Oración dos Fieis* (2000), *Rituais dos Sacramentos...* Sobresae particularmente o *Diurnal* ou *Liturxia das Horas* (1999), que, ademais dos textos bíblicos e a tradución das oracións, contén uns